

摘藻堂四庫全書薈要

史部

欽定四庫全書薈要

史部

通鑑紀事本末卷八上



欽定四庫全書舊要卷八千七百六

史部

通鑑紀事本末卷八上

宋 袁樞 撰

宦官亡漢

黨錮之禍

董卓之亂

漢和帝永元四年竇憲兄弟專權帝以朝臣上下莫不  
附憲獨中常侍鈞盾令鄭衆不事豪黨遂與定議誅憲

事見竇

氏專志鄭衆遷大長秋帝策勲班賞衆每辭多受少帝

由是賢之常與之議論政事宦官用權自此始矣

十四年 初封大長秋鄭衆為鄴鄉侯

安帝永初元年秋九月庚午太尉徐防以災異寇賊策免辛未司空尹勤以水雨漂流策免仲長統昌言曰光武皇帝愠數世之失權忿彊臣之竊命矯枉過直政不任下雖置三公事歸臺閣自此以來三公之職備員而已然政有不治猶加譴責而權移外戚之家寵被近習之豎親其黨類用其私人內充京師外布列郡顛倒賢愚貿易選舉疲驚守境貪殘牧民撓擾百姓忿怒四夷招致乖判亂離斯瘼怨氣並作陰陽失和三光虧缺乖

異數至蟲螟食稼水旱為災此皆戚宦之臣所致然也  
反以策讓三公至於死免乃足為叫呼蒼天號咷泣血  
者矣昔文帝之於鄧通可謂至愛而猶展中屠嘉之志  
夫見任如此則何患於左右小臣哉至如近世外戚宦  
豎請託不行意氣不滿立能陷人於不測之禍惡可得  
彈正者哉 大長秋鄭衆中常侍蔡倫等皆秉執豫政  
周章數進直言太后不能用

建光元年帝以江京嘗迎帝於邸封為都鄉侯李閔為

雍鄉侯閔京與中常侍樊豐黃門令劉安鈞盾令陳達等扇動內外競為侈虐司徒楊震上疏不省

延光二年中常侍樊豐等更相扇動傾搖朝廷楊震上疏不聽

三年樊豐等見楊震連諫不從無所顧忌震復上疏豐等惶怖遂共譖震收震太尉印綬遣歸本郡震飲酖而卒  
秋八月江京樊豐等廢太子保為濟陰王

四年北鄉侯即位有司奏樊豐等互作威福皆下獄死

冬十月中常侍孫程等迎濟陰王即皇帝位

五事並見  
佞倖廢立

順帝陽嘉二年夏六月丁丑洛陽宣德亭地拆長八十  
五丈帝引公卿所舉敦樸之士使之對策及特問以當  
世之敝為政所宜李固對曰詔書所以禁侍中尚書中  
臣子弟不得為吏察孝廉者以其秉威權容請託故也  
而中常侍在日月之側聲勢振天下子弟祿任曾無限  
極雖外託謙默不干州郡而諂偽之徒望風進舉今可  
為設常禁同之中臣昔館陶公主為子求郎明帝不許

賜錢千萬所以輕厚賜重薄位者為官人失才害及百姓也竊聞長水司馬武宣開陽城門候羊迪等無它功德初拜便真此雖小失而漸壞舊章先聖法度所宜堅守故政教一跌百年不復詩云上帝板板下民卒瘁刺周王變祖法度故使下民將盡病也今陛下之有尚書猶天之有北斗也斗為天喉舌尚書亦為陛下喉舌斗斟酌元氣運平四時尚書出納王命賦政四海權尊執重責之所歸若不平心災眚必至誠宜審擇其人以毗



聖政今與陛下共天下者外則公卿尚書內則常侍黃  
門辟猶一門之內一家之事安則共其福慶危則通其  
禍敗刺史二千石外統職事內受法則夫表曲者景必  
邪源清者流必潔猶叩樹本百枝皆動也由此言之本  
朝號令豈可蹉跌天下之紀綱當今之急務也夫人君  
之有政猶水之有隄防隄防完全雖遭雨水霖潦不能  
為變政教一立蹙遭凶年不足為憂誠令隄防穿漏萬  
夫同力不能復救政教一壞賢智馳驚不能復還今隄

防雖堅漸有孔穴譬之一人之身本朝者心腹也州郡者四支也心腹痛則四支不舉故臣之所憂在心腹之疾非四支之患也苟堅隄防務政教先安心腹整理本朝雖有寇賊水旱之變不足介意也誠令隄防壞漏心腹有疾雖無水旱之災天下固可以憂矣又宜罷退宦官去其權重裁置常侍二人方直有德者省事左右小黃門五人才智閑雅者給事殿中如此則論者厭塞升平可致也上覽衆對以李固為第一諸常侍叩頭謝罪

朝廷肅然以固為議郎宦者疾之詐為飛章以陷其罪  
事從中下大司農南郡黃尚等請之於梁商僕射黃瓊  
復救明其事久乃得釋出為洛令固棄官歸漢中

四年春二月初聽中官得以養子襲爵初帝之復位宦  
官之力也由是有寵參與政事御史張綱上書曰竊尋  
大明二帝德化允盛中官常侍不過兩人近倖賞賜裁  
滿數金惜費重民故家給人足而頃者以來無功小人  
皆有官爵非愛民重器承天順道者也書奏不省

永和元年十二月以前司空王龔為太尉龔疾宦官專權上書極言其狀諸黃門使客誣奏龔罪上命龔亟自實李固奏請於梁商曰王公以堅真之操橫為讒佞所誣衆人聞知莫不歎慄夫三公尊重無詣理訴寃之義纖微感慤輒引分決是以舊典不有大罪不至重問王公卒有它變則朝廷獲害賢之名羣臣無救護之節矣語曰善人在患饑不及餐斯其時也商即言之於帝事乃得釋

二年冬十月丁卯京師地震太尉王龔以中常侍張昉等專弄國權欲奏誅之宗親有以楊震行事諫之者龔乃止

三年梁商以曹節等用事遣子冀不疑與交友

桓帝建和元年秋七月詔封中常侍劉廣等皆為列侯杜喬諫之書奏不省  
宦者唐衡左悺等共譖杜喬

與李固以帝不堪奉漢祀帝怨之後梁冀誣李固杜喬與妖賊劉文等交通皆收繫死獄中

三事並見  
梁氏之變

永興元年秋七月郡國三十二蝗河水溢百姓饑窮流  
亡者數十萬戶冀州尤甚詔以侍御史朱穆為冀州刺  
史冀部令長聞穆濟河解印綬去者四十餘人及到奏  
劾諸郡貪污者有至自殺或死獄中宦者趙忠喪父歸  
葬安平僭為玉匣穆下郡案驗吏畏其嚴遂發墓剖棺  
陳尸出之帝聞大怒徵穆詣廷尉輸作左校太學書生  
潁川劉陶等數千人詣闕上書訟穆曰伏見弛刑徒朱  
穆處公憂國拜州之日志清姦惡誠以常侍貴寵父兄

子弟布在州郡競為虎狼噬食小民故穆張理天綱補綴漏目羅取殘禍以塞天意由是內官咸共恚疾謗讟煩興讒隙仍作極其刑謫輸作左校天下有識皆以穆同勤禹稷而被共鯀之戾若死者有知則唐帝怒於崇山重華忿於蒼墓矣當今中官近習竊恃國柄手握王爵口含天憲運賞則使餓隸富於季孫呼喻則令伊顏化為桀跖而穆獨亢然不顧身害非惡榮而好辱惡生而好死也徒感王綱之不攝懼天綱之久失故竭心懷

憂為上深計臣願黥首繫趾代穆校作帝覽其奏乃赦之

永壽元年春二月司隸冀州饑人相食太學生劉陶上疏陳事曰夫天之與帝帝之與民猶頭之與足相須而行也陛下目不視鳴條之事耳不聞檀車之聲天災不有痛於肌膚震食不即損於聖體故茂三光之謬輕上天之怒伏念高祖之起始自布衣合散扶傷克成帝業勤亦至矣流福遺祚至於陛下陛下既不能增明烈考



之軌而忽高祖之勤妄假利器委授國柄使羣醜刑隸  
芟刈小民虎豹窟於麀場豺狼乳於春囿貨殖者為窮  
冤之魂貧餒者作饑寒之鬼死者悲於寔窆生者戚於  
朝野是愚臣所為咨嗟長懷歎息者也且秦之將亡正  
諫者誅諛進者賞嘉言結於忠舌國命出於讒口擅閭  
樂於咸陽授趙高以車府權去已而不知威離身而不  
顧古今一揆成敗同軌願陛下遠覽彊秦之傾近察哀  
平之變得失昭然禍福可見臣又聞危非仁不扶亂非

智不救竊見故冀州刺史南陽朱穆前烏桓校尉臣同郡李膺皆履正清平真高絕俗斯實中興之良佐國家之柱臣也宜還本朝夾輔王室臣敢吐不時之義於諱言之朝猶冰霜見日必至消滅臣始悲天下之可悲今天下亦悲臣之愚惑也書奏不省

延熹二年夏六月帝召小黄門史唐衡中常侍單超小黄門史左悺中常侍徐璜黃門令具瑗等五人共定議誅梁冀

事見梁氏之變

八月詔賞誅梁冀之功封單超徐

璜具瑗左官唐衡皆為縣侯超食二萬戶璜等各萬餘戶世謂之五侯仍以愴衡為中常侍又封尚書令尹勲等七人皆為亭侯帝既誅梁冀故舊恩私多受封爵追贈皇后父鄧香為車騎將軍封安陽侯更封后母宣為昆陽君兄子康秉皆為列侯宗族皆列校即將賞賜以巨萬計中常侍侯覽上縑五千匹帝賜爵關內侯又託以與議誅冀進封高鄉侯又封小黃門劉普趙忠等八人為鄉侯自是權執專歸宦官矣五侯尤貪縱傾動內

外時災異數見白馬令甘陵李雲露布上書移副三府  
曰梁冀雖持權專擅虐流天下今以罪行誅猶召家臣  
搯殺之耳而猥封謀臣萬戶以上高祖聞之得無見非  
西北列將得無解體孔子曰帝者諦也今官位錯亂小  
人諂進財貨公行政化日損尺一拜用不經御省是帝  
欲不諦乎帝得奏震怒下有司逮雲詔尚書都護劔戟  
送黃門北寺獄使中常侍管霸與御史廷尉雜考之時  
弘農五官掾杜衆傷雲以忠諫獲罪上書願與雲同日

死帝愈怒遂并下廷尉大鴻臚陳蕃上疏曰李雲所言雖不識禁忌干上逆旨其意歸於忠國而已昔高祖忍周昌不諱之諫成帝赦朱雲腰領之誅今日殺雲臣恐剖心之譏復議於世矣太常楊秉雒陽市長沐茂郎中上官資並上疏請雲帝恚甚有司奏以為大不敬詔切責蕃秉免歸田里茂資貶秩二等時帝在濯龍池管霸奏雲等事霸跪言曰李雲野澤愚儒杜衆部中小吏出於狂戇不足加罪帝謂霸曰帝欲不諱是何等語而常

侍欲原之邪顧使小黃門可其奏雲衆皆死獄中於是  
嬖寵益橫太尉瓊自度力不能制乃稱疾不起上䟽曰  
陛下即位以來未有勝政諸梁秉權豎宦充朝李固杜  
喬旣以忠言橫見殘滅而李雲杜衆復以直道繼踵受  
誅海內傷懼益以怨結朝野之人以忠為諱尚書周永  
素事梁冀假其威勢見冀將衰乃陽毀示忠遂因姦計  
亦取封侯又黃門挾邪羣輩相黨自冀興盛腹背相親  
朝夕圖謀共構姦軌臨冀當誅無可設巧復記其惡

以要爵賞陛下不加清徵審別真偽復與忠臣並時顯  
封使朱紫共色粉墨雜揉所謂抵金玉於沙礫碎珪璧  
於泥塗四方聞之莫不憤歎臣世荷國恩身輕位重敢  
以垂絕之日陳不諱之言書奏不納冬十月中常侍單  
超疾病壬寅以超為車騎將軍

是時封賞踰制內

寵猥盛陳蕃上疏曰夫諸侯上象四七藩屏上國高祖  
之約非功臣不侯而聞追錄河南尹鄧萬世父遵之微  
功更爵尚書令黃雋先人之絕封近習以非義授邑左

右以無功傳賞至乃一門之內侯者數人故緯象失度  
陰陽謬序臣知封事已行言之無及誠欲陛下從是而  
止又采女數千食肉衣綺脂油粉黛不可貲計鄙諺言  
盜不過五女門以女貧家也今後宮之女豈不貧國乎  
帝頗采其言為出宮女五百餘人但賜雋爵關內侯而  
封萬世南鄉侯帝從容問侍中陳留爰延朕何如主也  
對曰陛下為漢中主帝曰何以言之對曰尚書令陳蕃  
任事則治中常侍黃門與政則亂是以知陛下可與為



善可與為非帝曰昔朱雲廷折欄檻今侍中面稱朕違  
敬聞闕矣拜五官中郎將

三年春正月丙午新豐侯單超卒賜東園祕器棺中玉  
具及葬發五營騎士將作大匠起冢塋其後四侯轉橫  
天下為之語曰左面天具獨坐徐卧虎唐兩墮皆競起  
第宅以華侈相尚其僕從皆乘牛車而從列騎兄弟姻  
戚宰州臨郡辜較百姓與盜無異虐徧天下民不堪命  
故多為盜賊焉中常侍侯覽小黃門段珪皆有田業近

濟北界僕從賓客劫掠行旅濟北相滕延一切收捕殺  
數十人陳尸路衢覽珪以事訴帝延坐徵詣廷尉免左  
官凡勝為河東太守皮氏長京兆趙岐恥之即日棄官  
西歸唐衡兄珪為京兆尹素與岐有隙收岐家屬宗親  
陷以重法盡殺之岐逃難四方靡所不歷自匿姓名賣  
餅北海市中安丘孫嵩見而異之載與俱歸藏於複壁  
中及諸唐死遇赦乃敢出

六年十二月以衛尉周景為司空景榮之孫也時宦官

方熾景與太尉楊秉上言內外吏職多非其人舊典中  
臣子弟不得居位秉執而今枝葉賓客布列職署或年  
少庸人典據守宰上下忿患四方愁毒可遵用舊章退  
貪殘塞災謗請下司隸校尉中二千石城門五營校尉  
北軍中候各實覈所部應當斥罷自以狀言三府兼察  
有遺漏續上帝從之於是秉條奏牧守青州刺史羊亮  
等五十餘人或死或免天下莫不肅然

尚書朱穆

疾宦官恣橫上疏曰按漢故事中常侍參選士人建武

以後乃悉用官者自延平以來浸益貴盛假貂璫之飾處常伯之任天朝政事一更其手權傾海內寵貴無極子弟親戚並荷榮任放濫驕溢莫能禁禦窮破天下空竭小民愚臣以為可悉罷省遵復往初更選海內清淳之士明達國體者以補其處即兆庶黎萌蒙被聖化矣帝不納後穆因進見復口陳曰臣聞漢家舊典置侍中中常侍各一人省尚書事黃門侍郎一人傳發書奏皆用姓族自和熹太后以女主稱制不接公卿乃以閹人

為常侍小黃門通命兩宮自此以來權傾人主窮困天下宜皆罷遣博選耆儒宿德與參政事帝怒不應穆伏不肯起左右傳出良久乃趨而去自此中官數因事稱詔詆毀之穆素剛不得意居無幾憤懣發疽卒

七年十二月中常侍汝陽侯唐衡武原侯徐璜皆卒

八年春中常侍侯覽兄參為益州刺史殘暴貪婪累賊億計太尉楊秉奏檻車徵參參於道自殺閱其車重三百餘兩皆金銀錦帛秉因奏曰臣案舊典宦官本在給

使省闈司昏守夜而今猥受過寵執政操權附會者因公褒舉違忤者求事中傷居法王公富擬國家飲食極肴膳僕妾盈紈素中常侍侯覽弟參貪殘元惡自取禍滅覽顧知釁重必有自擬之意臣愚以為不宜復見親近昔懿公刑邴歆之父奪閭職之妻而使二人參乘卒有竹中之難覽宜急屏斥投畀有虎若斯之人非恩所宥請免官送歸本郡書奏尚書召對秉掾屬詰之曰設官分職各有司存三公統外御史察內今越奏近官經

典漢制何所依據其開公具對秉使對曰春秋傳曰除  
君之惡唯力是視鄧通懈慢申屠嘉召通詰責文帝從  
而請之漢世故事三公之職無所不統尚書不能詰帝  
不得已竟免覽官司隸校尉韓續因奏左官罪惡及其  
兄太僕南鄉侯稱請託州郡聚斂為姦賓客放縱侵犯  
吏民官稱皆自殺續又奏中常侍具瑗兄沛相恭賊罪  
徵詣廷尉瑗詣獄謝上還東武侯印綬貶為都鄉侯  
超及璜衡襲封者並降為鄉侯子弟分封者悉奪爵土

劉普等貶為關內侯尹勲等亦皆奪爵 三月宛陵

大姓羊元羣罷北海郡賊汙狼藉郡舍溷軒有奇巧亦載之以歸河南尹李膺表案其罪元羣行賂宦官膺竟反坐單超弟遷為山陽太守以罪繫獄廷尉馮緄考致其死中官相黨共飛章誣緄以罪中常侍蘇康管霸固天下良田美業州郡不敢詰大司農劉祐移書所在依科品沒入之帝大怒與膺緄俱輸作左校 夏五月

丙戌太尉楊秉薨秉為人清白寡欲嘗稱我有三不惑



酒色財也秉旣沒所舉賢良廣陵劉瑜乃至京師上書  
言中官不當比肩裂土競立肩嗣繼體傳爵又嬖女克  
積穴食空宮傷生費國又第舍增多窮極竒巧掘山攻  
石促以嚴刑州郡官府各自考事姦情賕賂皆為吏餌  
民愁鬱結起入賊黨官輒興兵誅討其罪貧困之民或  
有責其首級以要酬賞父兄相代殘身妻孥相視分裂  
又陛下好微行近習之家私幸宦者之舍賓客市買熏  
灼道路因此暴縱無所不容惟陛下開廣諫道博觀前

古遠佞邪之人放鄭衛之聲則政致和平德感祥風矣  
詔特召瑜問灾咎之徵執政者欲令瑜依違其辭乃更  
策以他事瑜復悉心對八千餘言有切於前拜為議郎  
十一月太尉陳蕃數言李膺馮緄劉祐之枉請加  
原宥升之爵任言及反覆誠辭懇切以至流涕帝不聽  
應奉上疏曰夫忠賢武將國之心膂竊見左校弛刑徒  
馮緄劉祐李膺等誅舉邪臣肆之以法陛下既不聽察  
而猥受譖訴遂令忠臣同愆元惡自春迄冬不蒙降恕

遐邇觀聽為之歎息夫立政之要記功忘失是以武帝  
捨安國於徒中宣帝徵張敞於亡命緄前討蠻荆均吉  
甫之功祐數臨督司有不吐茹之節膺著威幽并遺愛  
度遼今三垂蠢動王旅未振乞原膺等以備不虞書奏  
乃悉免其刑久之李膺復拜司隸校尉時小黃門張讓  
弟朔為野王令貪殘無道畏膺威嚴逃還京師匿於兄  
家合柱中膺知其狀率吏卒破柱取朔付雒陽獄受辭  
畢即殺之讓訴寃於帝帝召膺詰以不先請便加誅之

意對曰昔仲尼為魯司寇七日而誅少正卯今臣到官已積一旬私懼以稽留為愆不意獲速疾之罪誠自知釁責死不旋踵特乞留五日剋殄元惡退就鼎鑊始生之願也帝無復言顧謂讓曰此汝弟之罪司隸何愆乃遣出自此諸黃門常侍皆鞠躬屏氣休沐不敢出宮省帝怪問其故並叩頭泣曰畏李校尉時朝廷日亂綱紀頽弛而膺獨持風裁以聲名自高士有被其容接者名為登龍門云

九年 初帝為蠡吾侯受學於其陵周福及即位擢福為尚書時同郡河南尹房植有名當朝鄉人為之謠曰天下規矩房伯武因師獲印周仲進二家賓客互相譏揣遂各樹朋徒漸成尤隙由是其陵有南北部黨人之議自此始矣汝南太守宗資以范滂為功曹南陽太守成瑨以岑暉為功曹皆委心聽任使之褒善糾違肅清朝府滂尤剛勁疾惡如讎滂甥李頌素無行中常侍唐衡以屬資資用為吏滂寢而不召資遷怒捶書佐朱零

零仰曰范滂清裁今日寧受笞而死滂不可違資乃止  
郡中中人以下莫不怨之於是二郡為謠曰汝南太守  
范孟博南陽宗資主畫諾南陽太守岑公孝弘農成瑨  
但坐嘯太學諸生三萬餘人郭泰及潁川賈彪為其冠  
與李膺陳蕃王暢更相褒重學中語曰天下模楷李元  
禮不畏彊禦陳仲舉天下俊秀王叔茂於是中外承風  
競以臧否相尚自公卿以下莫不畏其貶議屣履到門  
宛有富賈張汎者與後宮有親又善雕鏤玩好之物頗

以賂遺中宮以此得顯位用執縱橫岑暉與賊曹史張  
牧勸成瑨收捕汎等旣而遇赦瑨竟誅之并收其宗族  
賓客殺二百餘人後乃奏聞小黃門晉陽趙津貪橫放  
恣為一縣巨患太原太守平原劉瓚使郡吏王允討捕  
亦於赦後殺之於是中常侍侯覽使張汎妻上書訟冤  
宦官因緣譖訴瑨瓚帝大怒徵瑨瓚皆下獄有司承旨  
奏瑨瓚罪當棄市山陽太守翟超以郡人張儉為東部  
督郵侯覽家在防東殘暴百姓覽喪母還家大起塋冢

儉舉奏覽罪而覽伺候遮截章竟不上儉遂破覽冢宅  
籍沒資財具奏其狀復不得御徐璜兄子宣為下邳令  
暴虐尤甚嘗求故汝南太守李嵩女不能得遂將吏卒  
至嵩家載其女歸戲射殺之東海相汝南黃浮聞之收  
宣家屬無少長悉考之掾史以下固爭浮曰徐宣國賊  
今日殺之明日坐死足以瞑目矣即案宣罪棄市暴其  
尸於是宦官訴寃於帝帝大怒超浮並坐髡鉗輸作右  
校太尉陳蕃司空劉茂共諫請瑱瑣超浮等罪帝不悅



有司劾奏之茂不敢復言蕃乃獨上疏曰今寇賊在外  
四支之疾內政不理心腹之患臣寢不能寐食不能飽  
實憂左右日親忠言日踈內患漸積外難方深陛下超  
從列侯繼承天位小家畜產百萬之資子孫尚恥愧失  
其先業况乃產兼天下受之先帝而欲懈怠以自輕忽  
乎誠不愛已不當念先帝得之勤苦邪前梁氏五侯毒  
徧海內天啓聖意收而戮之天下之議冀當小平明鑒  
未遠覆車如昨而近習之權復相扇結小黃門趙津大

滑張汎等肆行貪虐姦媚左右前太原太守劉瓚南陽太守成瑨糾而戮之雖言赦後不當誅殺原其誠心在乎去惡至於陛下有何怕怕而小人道長熒惑聖聽遂使天威為之發怒必加刑謫已為過甚况乃重罰令伏歐刀乎又前山陽太守翟超東海相黃浮奉公不抗疾惡如讎超沒侯覽財物浮誅徐宣之罪並蒙刑坐不逢赦恕覽之從橫沒財已幸宣犯釁過死有餘辜昔丞相申屠嘉召責鄧通雒陽令董宣折辱公主而文帝從而

請之光武加以重賞未聞二臣有專命之誅而今左  
右羣豎惡傷黨類妄相交構致此刑譴聞臣是言當  
復曉訴陛下深宜割塞近習與政之源引納尚書朝  
省之士簡練清高斥黜佞邪如是天和於上地洽於下  
休徵符瑞豈遠乎哉帝不納宦官由此疾蕃彌甚選舉  
奏議輒以中詔譴卻長史已下多至抵罪猶以蕃名臣  
不敢加害平原襄楷詣闕上疏曰臣聞皇天不言以文  
象設教臣竊見太微天廷五帝之坐而金火罰星揚光

其中於占天子凶又俱入房心法無繼嗣前年冬大寒殺鳥獸害魚鼈城傍竹柏之葉有傷枯者臣聞於師曰柏傷竹枯不出三年天子當之今自春夏以來連有霜雹及大雨雷電臣作威作福刑罰急刻之所感也太原太守劉瓚南陽太守成瑨志除姦邪其所誅剪皆合人望而陛下受閹豎之譖乃遠加考逮三公上書乞哀瓚等不見採察而嚴被譴讓憂國之臣將遂杜口矣臣聞殺無非誅賢者禍及三世自陛下即位以來頻行誅罰

梁冠孫鄧並見族滅其從坐者又非其數李雲上書明  
主所不當諱杜衆乞死諒以感悟聖朝曾無赦宥而并  
被殘戮天下之人咸知其冤漢興以來未有拒諫誅賢  
用刑太深如今者也昔文王一妻誕致十子今宮女數  
千未聞慶育宜脩德省刑以廣螽斯之祚案春秋以來  
及古帝王未有河清臣以為河者諸侯位也清者屬陽  
濁者屬陰河當濁而反清者陰欲為陽諸侯欲為帝也  
京房易傳曰河水清天下平今天垂異地吐妖人癘疫

三者並時而有河清猶春秋麟不當見而見孔子書之  
以為異也願賜清問極盡所言書奏不省十餘日復上  
書曰臣聞殷紂好色妲己是出葉公好龍真龍游廷今  
黃門常侍天刑之人陛下愛待兼倍常寵繼嗣未兆豈  
不為此書上即召入詔尚書問狀楷言古者本無官臣  
武帝末數游後宮始置之耳尚書承旨奏楷不正辭理  
而違背經執假借星宿造合私意誣上罔事請下司隸  
正楷罪法收送雒陽獄帝以楷言雖激切然皆天文恒

象之數故不誅猶司寇論刑符節令汝南蔡衍議卽劉  
瑜表救成瑨劉瓚言甚切厲亦坐免官瑨瓚竟死獄中  
瑨瓚素剛直有經術知名當時故天下惜之岑暉張牧  
逃竄獲免暉之亡也親友競匿之賈彪獨閉門不納時  
人望之彪曰傳言相時而動無累後人公孝以要君致  
釁自遺其咎吾已不能奮戈相待反可容隱之乎於是  
咸服其裁正 河內張成善風角推占當赦教子殺人  
司隸李膺督促收捕旣而逢宥獲免膺愈懷憤疾竟按

殺之成素以方伎交通宦官帝亦頗訊其占宦官教成  
弟子牢脩上書告膺等養太學遊士交結諸郡生徒更  
相驅馳共為部黨誹訕朝廷疑亂風俗於是天子震怒  
班下郡國逮捕黨人布告天下使同忿疾案經三府太  
尉陳蕃卻之曰今所案者皆海內人譽憂國忠公之臣  
此等猶將十世宥也豈有罪名不章而致收掠者乎不  
肯平署帝愈怒遂下膺等於黃門北寺獄其辭所連及  
太僕潁川杜密御史中丞陳翔及陳寔范滂之徒二百



餘人或逃遁不獲皆懸金購募使者四出相望陳寔曰  
吾不就獄衆無所恃乃自往請囚范滂至獄獄吏謂曰  
凡坐繫者皆祭臯陶滂曰臯陶古之直臣知滂無罪將  
理之於帝如其有罪祭之何益衆人由此亦止陳蕃復  
上書極諫帝諱其言切託以蕃辟召非其人策免之時  
黨人獄所染逮者皆天下名賢度遼將軍皇甫規自以  
西州豪桀恥不得與乃自上言臣前薦故大司農張奐  
是附黨也又臣昔論輸左校時太學生張鳳等上書訟

臣是為黨人所附也臣宜坐之朝廷知而不問

張鳳等上書事

見諸羌

叛服

永康元年五月陳蕃既免朝臣震栗莫敢復為黨人言者賈彪曰吾不西行大禍不解乃入雒陽說城門校尉竇武尚書魏郡霍諝等使訟之武上疏曰陛下即位以來未聞善政常侍黃門競行譎詐妄爵非人伏尋西京佞臣執政終喪天下今不慮前事之失復循覆車之軌臣恐二世之難必將復及趙高之變不朝則夕近者姦

臣牢脩造設黨議遂收前司隸校尉李膺等逮考連及  
數百人曠年拘錄事無效驗臣惟膺等建忠抗節志經  
王室此誠陛下稷卨伊呂之佐而虛為姦臣賊子之所  
誣枉天下寒心海內失望惟陛下留神澄省時見理出  
以厭人鬼喁喁之心今臺閣近臣尚書朱寓荀緄劉祐  
魏朗劉矩尹勲等皆國之貞士朝之良佐尚書郎張陵  
矯皓苑康楊喬邊韶戴恢等文質彬彬明達國典內外  
之職羣才並列而陛下委任近習專樹饕餮外典州郡

內斡心膂宜以次貶黜案罪糾罰信任忠良平決臧否  
使邪正毀譽各得其所寶愛天官唯善是授如此咎徵  
可消天應可待間者有嘉禾芝草黃龍之見夫瑞生必  
於嘉士福至實由善人在德為瑞無德為災陛下所行  
不合天意不宜稱慶書奏因以病上還城門校尉槐里  
侯印綬霍諝亦為表請帝意稍解使中常侍王甫就獄  
訊黨人范滂等皆三木囊頭暴於階下甫以次辨詰曰  
卿等更相拔舉迭為脣齒其意如何滂曰仲尼之言見

善如不及見惡如探湯滂欲使善善同其清惡惡同其  
汙謂王政之所願聞不悟更以為黨古之修善自求多福  
今之脩善身陷大戮身死之日願埋滂於首陽山側上  
不負皇天下不愧夷齊甫愍然為之改容乃得並解桎  
梏李膺等又多引宦官子弟宦官懼請帝以天時宜赦  
六月庚申赦天下改元黨人二百餘人皆歸田里書名  
三府禁錮終身范滂往候霍諝而不謝或讓之滂曰昔  
叔向不見祁奚吾何謝焉滂南歸汝南南陽士大夫迎

之者車數千兩鄉人殷陶黃穆侍衛於旁應對賓客滂  
謂陶等曰今子相隨是重吾禍也遂遁還鄉里初詔書  
下舉鉤黨郡國所奏相連及者多至百數唯平原相史  
弼獨無所上詔書前後迫切州郡髡笞掾史從事坐傳  
舍責曰詔書疾惡黨人旨意懇惻青州六郡其五有黨  
平原何治而得獨無弼曰先王疆理天下畫界分境水土  
異齊風俗不同它郡自有平原自無胡可相比若承  
望上司誣陷良善淫刑濫罰以逞非理則平原之人戶

可為黨相有死而已所不能也從事大怒即收郡僚職  
送獄遂舉奏弼會黨禁中解弼以俸贖罪所脫者甚衆  
竇武所薦朱寓沛人苑康勃海人楊喬會稽人邊韶陳  
留人喬容儀偉麗數上言政事帝愛其才貌欲妻以公  
主喬固辭不聽遂閉口不食七日而死 十二月丁

丑帝崩於德陽前殿城門校尉竇武議立嗣召侍御史  
河間劉儵問以國中宗室之賢者儵稱解瀆亭侯宏宏  
者河間孝王之曾孫也祖淑父萇世封解瀆亭侯武乃

入白太后定策禁中以儵守光祿大夫與中常侍曹節並持節將中黃門虎賁羽林千人奉迎宏時年十二

靈帝建寧元年春正月壬午以城門校尉竇武為大將軍前太尉陳蕃為太傅與武及司徒胡廣參錄尚書事時新遭大喪國嗣未立諸尚書畏懼多託病不朝陳蕃移書責之曰古人立節事亡如存今帝祚未立政事日蹙諸君柰何委荼蓼之苦息偃在牀於義安乎諸尚書惶怖皆起視事 己亥解瀆亭侯至夏門亭使竇武持節



以王青蓋車迎入殿中庚子即皇帝位 六月癸巳

錄定策功封竇武為聞喜侯武子機為渭陽侯兄子紹  
為鄠侯靖為西鄉侯中常侍曹節為長安鄉侯侯者凡  
十一人涿郡盧植上書說武曰足下之於漢朝猶旦奭  
之在周室見立聖主四海有繫論者以為吾子之功於  
斯為重今同宗相後披圖案牒以次建之亦何勲之有  
豈可橫叨天功以為己力乎宜辭大賞以全身名武不  
能用植身長八尺二寸音聲如鐘性剛毅有大節少事

馬融融性豪侈多列女倡歌舞於前植侍講積年未嘗轉盼融以是敬之太后以陳蕃舊德特封高陽鄉侯蕃上疏讓曰臣聞割地之封功德是為臣雖無素潔之行竊慕君子不以其道得之不居也若受爵不讓掩面就之使皇天振怒災流下民於臣之身亦何所寄太后不許蕃固讓章前後十上竟不受封 初竇太后之立也陳蕃有力焉及臨朝政無大小皆委於蕃蕃與竇武同心戮力以樊王室徵天下名賢李膺杜密尹勲劉瑜等

皆列於朝廷與共參政事於是天下之士莫不延頸想望太平而帝乳母趙嬀及諸女尚書旦夕在太后側中常侍曹節王甫等共相朋結諂事太后太后信之數出詔命有所封拜蕃武疾之嘗共會朝堂蕃私謂武曰曹節王甫等自先帝時操弄國權濁亂海內今不誅之後必難圖武深然之蕃大喜以手推席而起武於是引同志尚書令尹勲等共定計策會有日食之變蕃謂武曰昔蕭望之困一石顯況今石顯數十輩乎蕃以八十之

年欲為將軍除害今可因日食斥罷官官以塞天變武乃白太后曰故事黃門常侍但當給事省內門戶主近署財物耳今乃使與政事任重權子弟布列專為貪暴天下匈匈正以此故宜悉誅廢以清朝廷太后曰漢元以來故事世有宦官但當誅其有罪者豈可盡廢邪時中常侍管霸頗有才略專制省內武先白收霸及中常侍蘇康等皆坐死武復數白誅曹節等太后猶豫未忍故事久不發蕃上疏曰今京師蹢蹢道路諠譁言候覽

曹節公乘昕王甫鄭颯等與趙夫人諸尚書並亂天下  
附從者升進忤逆者中傷一朝羣臣如河中木耳汎汎  
東西耽祿畏害陛下今不急誅此曹必生變亂傾危社  
稷其禍難量願出臣章宣示左右并令天下諸姦知臣  
疾之太后不納是月太白犯房之上將入太微侍中劉  
瑜素善天官惡之上書皇太后曰案占書宮門當閉將  
相不利姦人在主傍願急防之又與武蕃書以星辰錯  
繆不利大臣宜速斷大計於是武蕃以朱寓為司隸校

尉劉祐為河南尹虞祁為雒陽令武奏免黃門令魏彪以所親小黃門山冰代之使冰奏收長樂尚書鄭颯送北寺獄蕃謂武曰此曹子便當收殺何復考為武不從令冰與尹勲侍御史祝瑁雜考颯辭連及曹節王甫勲冰即奏收節等使劉瑜內奏九月辛亥武出宿歸府典中書者先以告長樂五官史朱瑀盜發武奏罵曰中官放縱者自可誅耳我曹何罪而當盡見族滅因大呼曰陳蕃竇武奏白太后廢帝為大逆乃夜召素所親壯健

者長樂從官吏共普張亮等十七人嘔血共盟謀誅武  
等曹節白帝曰外間切切請出御德陽前殿令帝拔劍  
踊躍使乳母趙嬈等擁衛左右取榮信閉諸禁門召尚  
書官屬脅以白刃使作詔板拜王甫為黃門令持節至  
北寺獄收尹勲山冰冰疑不受詔甫格殺之并殺勲出  
鄭颯還兵劫太后奪璽綬令中謁者守南宮閉門絕複  
道使鄭颯等持節及侍御史謁者捕收武等武不受詔  
馳入步兵營與其兄子步兵校尉紹共射殺使者召會

北軍五校士數千人屯都亭下令軍士曰黃門常侍反盡力者封侯重賞陳蕃聞難將官屬諸生八十餘人並拔刃突入承明門到尚書門攘臂呼曰大將軍忠以衛國黃門反逆何云竇氏不道邪王甫時出與蕃相遇適聞其言而讓蕃曰先帝新棄天下山陵未成武有何功兄弟父子並封三侯又設樂飲讌多取掖廷宮人旬日之間貨財巨萬大臣若此為是道邪公為宰輔苟相阿黨復何求賊使劔士收蕃蕃披劔叱甫辭色逾厲遂執



蕃送北寺獄黃門從官騶蹋蹶蕃曰死老魅復能損我  
曹員數奪我曹稟假不即日殺之時護匈奴中郎將張  
奐徵還京師曹節等以奐新至不知本謀矯制以少府  
周靖行車騎將軍加節與奐率五營士討武夜漏盡王  
甫將虎賁羽林等合千餘人出屯朱雀掖門與奐等合  
已而悉軍闕下與武對陳甫兵漸盛使其士大呼武軍  
曰竇武反汝皆禁兵當宿衛官省何故隨反者乎先降  
有賞營府素畏服中官於是武軍稍稍歸甫自旦至食

時兵降略盡武紹走諸軍追圖之皆自殺梟首雒陽都  
亭收捕宗親賓客姻屬悉誅之及侍中劉瑜屯騎校尉  
馮述皆夷其族宦官又譖虎賁中郎將河間劉淑故尚  
書會稽魏朗云與武等通謀皆自殺遷皇太后於南宮  
徙武家屬於日南自公卿以下嘗為蕃武所舉者及門  
生故吏皆免官禁錮議郎勃海巴肅始與武等同謀曹  
節等不知但坐禁錮後乃知而收之肅自載詣縣縣令  
見肅入閤解印綬欲與俱去肅曰為人臣者有謀不敢

隱有罪不逃刑既不隱其謀矣又敢逃其刑乎遂被誅  
曹節遷長樂衛尉封育陽侯王甫遷中常侍黃門令如  
故朱瑀共普張亮等六人皆為列侯十一人為關內侯  
於是羣小得志士大夫皆喪氣蕃友人陳留朱震收葬  
蕃尸匿其子逸事覺繫獄合門桎梏震受考掠誓死不  
言逸由是得免武府掾桂陽胡騰殞歛武尸行喪坐以  
禁錮武孫輔年二歲騰詐以為已子與令史南陽張敞  
共匿之於零陵界中亦得免張奐遷大司農以功封侯

與深病為曹節等所賣固辭不受

二年夏四月壬辰有青蛇見於御坐上癸巳大風雨雹  
霹靂拔大木百餘詔公卿以下各上封事大司農張與  
上疏曰昔周公葬不如禮天乃動威今竇武陳蕃忠貞  
未被明宥妖青之來皆為此也宜急為改葬徙還家屬  
其從坐禁錮一切蠲除又皇太后雖居南宮而恩禮不  
接朝臣莫言遠近失望宜思大義顧復之報上深嘉與  
言以問諸常侍左右皆惡之帝不得自從與又與尚書

劉猛等共薦王暢李膺可參三公之選曹節等彌疾其  
言遂下詔切責之與等皆自囚廷尉數日乃得出並以  
三月俸贖罪郎中東郡謝弼上封事曰臣聞惟虺惟蛇  
女子之祥伏惟皇太后定策宮闈援立聖明書云父子  
兄弟罪不相及竇氏之誅豈宜咎延太后幽隔空宮愁  
感天心如有霧露之疾陛下當何面目以見天下孝和  
皇帝不絕竇氏之恩前世以為美談禮為人後者為之  
子今以桓帝為父豈得不以太后為母哉願陛下仰慕

有虞蒸蒸之化俯思凱風慰母之念臣又聞開國承家  
小人勿用今功臣久外未蒙爵秩阿母寵私乃享大封  
大風雨雹亦由於茲又故太傅陳蕃勤身王室而見陷  
羣邪一旦誅滅其為酷濫駭動天下而門生故吏並離  
徙錮蕃身已往人百何贖宜還其家屬解除禁網夫台  
宰重器國命所繫今之四公唯司空劉寵斷斷守善餘  
皆素餐致寇之人必有折足覆餗之凶可因災異並加  
罷黜徵故司空王暢長樂少府李膺並居政事庶災變

可消國祚惟永左右惡其言出為廣陵府丞去官歸家  
曹節從子紹為東郡太守以它罪收弼掠死於獄帝以  
蛇妖問光祿勳楊賜賜上封事曰夫善不妄來災不空  
發王者心有所想雖未形顏色而五星以之推移陰陽  
為其變度夫皇極不建則有龍蛇之孽詩云惟虺惟蛇  
女子之祥惟陛下思乾剛之道別內外之宜抑皇甫之  
權割艷妻之愛則蛇變可消禎祥立應賜秉之子也

初李膺等雖廢錮天下士大夫皆高尚其道而汙穢

朝廷希之者唯恐不及更共相標榜為之稱號以竇武  
陳蕃劉淑為三君君者言一世之所宗也李膺荀翌杜  
密王暢劉祐魏朗趙典朱寓為八俊俊者言人之英也  
郭泰范滂尹勲巴肅及南陽宗慈陳留夏馥汝南蔡衍  
泰山羊陟為八顧顧者言能以德行引人者也張儉翟  
超岑暉苑康及山陽劉表汝南陳翔魯國孔昱山陽檀  
敷為八及及者言其能導人追宗者也度尚及東平張  
邈王孝東郡劉儒泰山胡毋班陳留秦周魯國蕃嚮東



萊王章為八厨厨者言能以財救人者也及陳竇用事  
復舉拔庸等陳竇誅庸等復廢宦官疾惡庸等每下詔  
書輒申黨人之禁侯覽怨張儉尤甚覽鄉人朱並素佞  
邪為儉所棄承覽意指上書告儉與同鄉二十四人別  
相署號共為部黨圖危社稷而儉為之魁詔刊章捕儉  
等冬十月大長秋曹節因此諷有司奏諸鉤黨者故司  
空虞放及李膺杜密朱寓荀翬翟超劉儒范滂等請下  
州郡考治是時上年十四問節等曰何以為鉤黨對曰

鉤黨者即黨人也上曰黨人何用為惡而欲誅之邪對  
曰皆相舉羣輩欲為不軌上曰不軌欲如何對曰欲圖  
社稷上乃可其奏或謂李膺曰可去矣對曰事不辭難  
罪不逃刑臣之節也吾年已六十死生有命去將安之  
乃詣詔獄考死門生故吏並被禁錮侍御史蜀郡景毅  
子顧為膺門徒未有錄牒不及於譴毅慨然曰本謂膺  
賢遣子師之豈可以漏脫名籍苟安而已遂自表免歸  
汝南督郵吳導受詔捕范滂至征羌抱詔書閉傳舍伏

牀而泣一縣不知所為滂聞之曰必為我也即自詣獄  
縣令郭揖大驚出解印綬引與俱亡曰天下大矣子何  
為在此滂曰滂死則禍塞何敢以罪累君又令老母流  
離乎其母就與之訣滂白母曰仲博孝敬足以供養滂  
從龍舒君歸黃泉存亡各得其所惟大人割不可忍之  
恩勿增感戚仲博者滂弟也龍舒君者滂父龍舒侯相  
顯也母曰汝今得與李杜齊名死亦何恨既有令名復  
求壽考可兼得乎滂跪受教再拜而辭顧其子曰吾欲

使汝為惡惡不可為使汝為善則我不為惡行路聞之  
莫不流涕凡黨人死者百餘人妻子皆徙邊天下豪傑  
及儒學有行義者宦官一切指為黨人有怨隙者因相  
陷害睚眦之忿濫入黨中州郡承旨或有未嘗交關亦  
罹禍毒其死徙廢禁者又六七百人郭泰聞黨人之死  
私為之慟曰詩云人之云亡邦國殄瘁漢室滅矣但未  
知瞻烏爰止于誰之屋耳泰雖好臧否人倫而不為危  
言覈論故能處濁世而怨禍不及焉張儉亡命困迫望

門投止莫不重其名行破家相容後流轉東萊止李篤  
家外黃令毛欽操兵到門篤引欽就席曰張儉負罪亡  
命篤豈得藏之若審在此此人名士明廷寧宜執之乎  
欽因起撫篤曰蘧伯玉恥獨為君子足下如何專取仁  
義篤曰今欲分之明廷載半去矣欽歎息而去篤導儉  
經北海戲子然家遂入漁陽出塞其所經歷伏重誅者  
以十數連引收考者布徧天下宗親並皆殄滅郡縣為  
之殘破儉與魯國孔褒有舊亡抵褒不遇褒弟融年十

六匿之後事泄儉得亡走國相收褒融送獄未知所坐  
融曰保納舍藏者融也當坐褒曰彼來求我非弟之過  
吏問其母母曰家事任長妾當其辜一門爭死郡縣疑  
不能決乃上讞之詔書竟坐褒及黨禁解儉乃還鄉里  
後為衛尉卒年八十四夏馥聞張儉亡命歎曰孽自己  
作空汙良善一人逃死禍及萬家何以生為乃自剪鬚  
變形入林慮山中隱姓名為冶家傭親突煙炭形貌毀  
瘁積二三年人無知者馥弟靜載縑帛追求餉之馥不

受曰弟奈何載禍相餉乎黨禁未解而卒初中常侍張讓父死歸葬潁川雖一郡畢至而名士無往者讓甚恥之陳寔獨弔焉及誅黨人讓以寔故多所全宥南陽何顓素與陳蕃李膺善亦被收捕乃變名姓匿汝南間與袁紹為犇走之交常私入雒陽從紹計議為諸名士惟黨事者求救援設權計使得逃隱所全免甚衆初太尉素湯三子成逢隗成生紹逢生術逢隗皆有名稱少歷顯官時中常侍素赦以逢隗宰相家與之同姓推崇以

為外援故素氏貴寵於世富奢甚不與它公族同紹壯  
健有威容愛士養名賓客輻湊歸之輜輶柴轂填接街  
陌術亦以俠氣聞逢從兄子閔少有操行以耕學為業  
逢隗數饋之無所受閔見時方險亂而家門富盛常對  
兄弟歎曰吾先公福祚後世不能以德守之而競為驕  
奢與亂世爭權此即晉之三郤矣及黨事起閔欲投迹  
深林以母老不宜遠遁乃築土室四周於庭不為戶自  
牖納飲食母思閔時往就視母去便自掩閉兄弟妻子



莫得見也潛身十八年卒於土室初范滂等非訐朝政  
自公卿以下皆折節下之太學生爭慕其風以為文學  
將興處士復用申屠蟠獨歎曰昔戰國之世處士橫議  
列國之王至為擁篲先驅卒有坑儒燒書之禍今之謂  
矣乃絕迹於梁碭之間因樹為屋自同傭人居二年滂  
等果罹黨錮之禍唯蟠超然免於評論

臣光曰天下有道君子揚于王庭以正小人之罪而莫  
敢不服天下無道君子囊括不言以避小人之禍而猶

或不免黨人生昏亂之世不在其位四海橫流而欲以  
口舌救之臧否人物激濁揚清撩虺蛇之頭踐虎狼之  
尾以至身被淫刑禍及朋友士類殲滅而國隨以亡不  
亦悲乎夫唯郭泰旣明且哲以保其身申屠蟠見幾而  
作不俟終日卓乎其不可及已

十一月長樂太僕曹節病困詔拜車騎將軍有頃疾瘳  
上印綬復為中常侍位特進秩中二千石

四年春正月甲子帝加元服赦天下唯黨人不赦

帝以竇太后有援立之功冬十月戊子朔率羣臣朝太后於南宮親饋上壽黃門令董萌因此數為太后訴寃帝深納之供養資奉有加於前曹節王甫疾之誣萌以謗訕永樂宮下獄死

熹平元年五月長樂太僕侯覽坐專權驕奢策收印綬自殺六月竇太后母卒於比景太后憂思感疾癸

巳崩於雲臺宦者積怨竇氏以衣車載太后尸置城南市舍數日曹節王甫欲用貴人禮殯帝曰太后親立朕

躬統承大業宣宜以貴人終乎於是發喪成禮節等欲別葬太后而以馮貴人配祔詔公卿大會朝堂令中常侍趙忠監議太尉李咸時病扶輿而起擣椒自隨謂妻子曰若皇太后不得配食桓帝吾不生還矣既議坐者數百人各瞻望良久莫肯先言趙忠曰議當時定廷尉陳球曰皇太后以盛德良家母臨天下宜配先帝是無所疑忠笑而言曰陳廷尉宜便操筆球即下議曰皇太后自在椒房有聰明母儀之德遭時不造援立聖明承

繼宗廟功烈至重先帝晏駕因遇大獄遷居空宮不幸  
早世家雖獲罪事非太后今若別葬誠失天下之望且  
馮貴人家嘗被發掘骸骨暴露與賊併尸魂靈汙染且  
無功於國何宜上配至尊忠省球議作色俛仰蚩球曰  
陳廷尉建此議甚健球曰陳竇旣寃皇太后無故幽閉  
臣嘗痛心天下憤歎今日言之退而受罪宿昔之願也  
李咸曰臣本謂宜爾誠與意合於是公卿以下皆從球  
議曹節王甫猶爭以為梁后家犯惡逆別葬懿陵武帝

黜廢衛后而以李夫人配食今竇氏罪深豈得合葬先  
帝李咸復上疏曰臣伏惟章德竇后虐害恭懷安思閭  
后家犯惡逆而和帝無異葬之議順朝無貶降之文至  
於衛后孝武皇帝身所廢棄不可以為比今長樂太后  
尊號在身親嘗稱制且援立聖明光隆皇祚太后以陛  
下為子陛下豈得不以太后為母子無黜母臣無貶君  
宜合葬宣陵一如舊制帝省奏從之秋七月甲寅葬桓  
思皇后於宣陵 有人書朱雀闕言天下大亂曹節

王甫幽殺太后公卿皆尸祿無忠言者詔司隸校尉劉  
猛逐捕十日一會猛以誹書言直不肯急捕月餘主名  
不立猛坐左轉諫議大夫以御史中丞段熲代之熲乃  
四出逐捕及太學游生繫者千餘人節等又使熲以它  
事奏猛論輸左校初司隸校尉王寓依倚宦官求薦於  
太常張奐奐拒之寓遂陷奐以黨罪禁錮

渤海王

惺之貶屢陶也因中常侍王甫求復國許謝錢五十萬  
既而桓帝遺詔復惺國惺知非甫功不肯還謝錢中常

侍鄭颯中黃門董騰數與惺交通甫密司察以告段頴  
冬十月收颯送北寺獄使尚書令廉忠誣奏颯等謀迎  
立惺大逆不道遂詔冀州刺史收惺考實追責惺令自  
殺妃妾十一人子女七十人伎女二十四人皆死獄中  
傅相以下悉伏誅甫等十二人皆以功封列侯

五年閏五月永昌太守曹鸞上書曰夫黨人者或者年  
淵德或衣冠英賢皆宜股肱王室左右大猷者也而久  
被禁錮辱在塗泥謀反大逆尚蒙赦宥黨人何罪獨不



開恕乎所以災異屢見水旱荐臻皆由於斯宜加沛然以副天心帝省奏大怒即詔司隸益州檻車收鸞送槐里獄掠殺之於是詔州郡更考黨人門生故吏父子兄弟在位者悉免官禁錮爰及五屬

光和元年六月丁丑有黑氣墮帝所御溫德殿東庭中長十餘丈似龍秋七月壬子青虹見玉堂後殿庭中詔召光祿大夫楊賜等詣金商門問以災異及消復之術賜對曰春秋讖曰天投蜺天下怨海內亂加四百之期

亦復垂及今妾媵閹尹之徒共專國朝欺罔日月幸賴  
皇天垂象譴告周書曰天子見怪則修德諸侯見怪則  
修政卿大夫見怪則修職士庶人見怪則修身唯陛下  
斥遠佞巧之臣速徵鶴鳴之士斷絕尺一抑止槃游冀  
上天還威衆變可弭議郎蔡邕對曰臣伏思諸異皆亡  
國之怪也天於大漢殷勤不已故屢出祇變以當譴責  
欲令人君感悟改危即安今蜺墮雞化皆婦人干政之  
所致也前者乳母趙婕貴重天下讒諛驕溢續以永樂

門史霍玉依阻城社又為姦邪今道路紛紛復云有程  
大人者察其風聲將為國患宜高為隄防明設禁令深  
惟趙霍以為至戒今太尉張顥為玉所進光祿勳姓璋  
有名貪濁又長水校尉趙珣屯騎校尉蓋升竝叨時幸  
榮富優足宜念小人在位之咎退思引身避賢之福伏  
見廷尉郭禧純厚老成光祿大夫橋玄聰達方直故太  
尉劉寵忠實守正並宜為謀主數見訪問夫宰相大臣  
君之四體委任責成優劣已分不宜聽納小吏雕琢大

臣也又尚方工技之作鴻都篇賦之文可且消息以示  
惟憂宰府孝廉士之高選近者以辟召不慎切責三公  
而今竝以小文超取選舉開請託之門違明王之典衆  
心不厭莫之敢言臣願陛下忍而絕之思惟萬機以答  
天望聖朝旣自約厲左右近臣亦宜從化人自抑損以  
塞咎戒則天道虧滿鬼神福謙矣夫君臣不密上有漏  
言之戒下有失身之禍願寢臣表無使盡忠之吏受怨  
姦仇章奏帝覽而歎息因起更衣曹節於後竊視之悉

宣語左右事遂漏露其為邕所裁黜者側目思報初邕與大鴻臚劉邵素不相平叔父衛尉質又與將作大匠陽球有隙球即中常侍程璜女夫也璜遂使人飛章言邕質數以私事請託於邵邵不聽邕含隱切志欲相中於是詔下尚書召邕詰狀邕上書曰臣實愚贛不顧後害陛下不念忠臣直言宜加掩蔽誹謗卒至使用疑怪臣年四十有六孤特一身得託名忠臣死有餘榮恐陛下於此不復聞至言矣於是下邕質於雒陽獄劾以仇

怨奉公議害大臣大不敬棄市事奏中常侍河南呂彊  
愍邕無罪力為伸請帝亦更思其章有詔減死一等與  
家屬髡鉗徙朔方不得以赦令除陽球使客追路刺邕  
客感其義皆莫為用球又賂其部主使加毒害所賂者  
反以其情戒邕由是得免

宋皇后無寵後宮幸姬

衆共譖毀渤海王惔妃宋氏即后之姑也中常侍王甫  
恐后怨之因譖后挾左道祝詛帝信之遂策收璽綬后  
自致暴室以憂死父不其鄉侯鄴及兄弟竝被誅

丙子晦日有食之尚書盧植上言凡諸黨錮多非其罪可加赦恕申宥回枉又宋后家屬竝以無辜委骸橫尸不得歛葬宜救收拾以安遊魂帝不省

二年王甫曹節等姦虐弄權扇動內外太尉段熲阿附之節甫父兄子弟為卿校牧守令長者布滿天下所在貪暴甫養子吉為沛相尤殘酷凡殺人皆磔尸車上隨其罪目宣示屬縣夏月腐爛則以繩連其骨周徧一郡乃止見者駭懼視事五年凡殺萬餘人尚書令陽球常

拊髀發憤曰若陽球作司隸此曹子安得容乎旣而球果遷司隸甫使門生於京兆界辜權官財物七千餘萬京兆尹楊彪發其姦言之司隸彪賜之子也時甫休沐里舍頽方以日食自劾球詣闕謝恩因奏甫頽及中常侍淳于登素赦封翊等罪惡辛巳悉收甫頽等送洛陽獄及甫子永樂少府萌沛相吉球自臨考甫等五毒備極萌先嘗為司隸乃謂球曰父子旣當伏誅亦以先後之義少以楚毒假借老父球曰爾罪惡無狀死不減責



乃欲論先後求假借邪萌乃罵曰爾前奉事吾父子如  
奴奴敢反汝主乎今日臨阬相擠行自及也球使以土  
窒萌口箠扑交至父子悉死於杖下頰亦自殺乃僵磔  
甫屍於夏城門大署榜曰賊臣王甫盡沒入其財產妻  
子皆徙比景球旣誅甫欲以次表曹節等乃敕中都官  
從事曰且先去權貴大猾乃議其餘耳公卿豪右若素  
氏兒輩從事自辦之何須校尉邪權門聞之莫不屏氣  
曹節等皆不敢出沐會順帝虞貴人葬百官會喪還曹

節見磔甫尸道次慨然拭淚曰我曹可自相食何宜使  
犬舐其汁乎語諸常侍今且俱入勿過里舍也節直入  
省白帝曰陽球故酷暴吏前二府奏當免官以九江微  
功復見擢用愆過之人好為妄作不宜使在司隸以騁  
毒虐帝乃徙球為衛尉時球出謁陵節敕尚書令召拜  
不得稽留尺一球被召急因求見帝叩頭曰臣無清高  
之行橫蒙鷹犬之任前雖誅王甫段熲蓋狐狸小醜未  
足宣示天下願假臣一月必令豺狼鴟梟各服其辜叩

頭流血殿上呵叱曰衛尉扞詔邪至於再三乃受拜於是曹節朱瑀等權執復盛節領尚書令郎中梁人審忠上書曰陛下即位之初未能萬機皇太后念在撫育權時攝政故中常侍蘇康管霸應時誅殄太傅陳蕃大將軍竇武考其黨與志清朝政華容侯朱瑀知事覺露禍及其身遂興造逆謀作亂王室撞踊省闈執奪璽綬迫脅陛下聚會羣臣離間骨肉母子之恩遂誅蕃武及尹勲等因共割裂城社自相封賞父子兄弟被蒙尊榮素

所親厚布在州郡或登九列或據三司不惟祿重位尊  
之責而苟營私門多蓄財貨繕修第舍連里竟巷盜取  
御水以作漁釣車馬服玩擬於天家羣公卿士杜口吞  
聲莫敢有言州牧郡守承順風旨辟召選舉釋賢取愚  
故蟲蝗為之生夷寇為之起天意憤盈積十餘年故頻  
歲日食於上地震於下所以譴戒人主欲令覺悟誅鉏  
無狀昔高宗以雉雊之變故獲中興之功近者神祇啟  
悟陛下發赫斯之怒故王甫父子應時馘截路人士女

莫不稱善若除父母之讎誠怪陛下復忍尊臣之類不  
悉殄滅昔秦信趙高以危其國吳使刑人身毒其禍今  
以不忍之恩赦夷族之罪姦謀一成悔亦何及臣為郎  
十五年皆耳目聞見瑀之所為誠皇天所不復赦願陛  
下留漏刻之聽裁省臣表歸滅醜類以答天怒與瑀考  
驗有不如言願受湯鑊之誅妻子并徙以絕妄言之路  
章寢不報中常侍呂彊清忠奉公帝以衆例封為都鄉  
侯彊固辭不受因上䟽陳事曰臣聞高祖重約非功臣

不侯所以重天爵明勸戒也中常侍曹節等宦官祐薄  
品卑人賤讒諂媚主佞邪徼寵有趙高之禍未被轆裂  
之誅陛下不悟妄授茅土開國承家小人是用又并及  
家人重金兼紫交結邪黨下比羣佞陰陽乖刺稼穡荒  
蕪人用不康罔不由茲臣誠知封事已行言之無逮所  
以冒死干觸陳愚忠者實願陛下損改旣謬從此一止  
臣又聞後宮采女數千餘人衣食之費日數百金比穀  
雖賤而戶有饑色案法當貴而今更賤者由賦發繁數

以解縣官寒不敢衣饑不敢食民有斯厄而莫之卹宮  
女無用填積後庭天下雖復盡力耕桑猶不能供又前  
召議郎蔡邕對問於金商門邕不敢懷道迷國而切言  
極對毀刺貴臣譏呵宦官陛下不密其言至今宣露群  
邪頂領膏唇拭舌競欲咀嚼造作飛條陛下回受誹謗  
致邕刑罪室家徙放老幼流離豈不負忠臣哉今羣臣  
皆以邕為戒上畏不測之難下懼劔客之害臣知朝廷  
不復得聞忠言矣故太尉段熲武勇冠世習於邊事垂

髮服戎功成皓首歷事二主勲烈獨昭陛下旣已式序  
位登台司而為司隸校尉陽球所見誣脅一身旣斃而  
妻子遠播天下惆悵功臣失望宜徵邕更加授任反類  
家屬則忠貞路開衆怨以弭矣帝知其忠而不能用

上祿長和海上言禮從祖兄弟別居異財恩義已輕  
服屬䟽末而今黨人錮及五族旣乖典訓之文有謬經  
常之法帝覽之而悟於是黨錮自從祖以下皆得解釋  
初司徒劉郃兄侍中儵與竇武同謀俱死永樂少府



陳球說郃曰公出自宗室位登台鼎天下瞻望社稷鎮  
衛豈得雷同容容無違而已今曹節等放縱為害而久  
在左右又公兄侍中受害節等今可表徙衛尉陽球為  
司隸校尉以次收節等誅之政出聖主天下太平可翹  
足而待也郃曰凶豎多耳目恐事未會先受其禍尚書  
劉納曰為國棟梁傾危不持焉用彼相邪郃許諾亦與  
陽球結謀球小妻程璜之女由是節等頗得聞知乃重  
賂璜且脅之璜懼迫以球謀告節節因共白帝曰郃與

劉納陳球陽球交通書疏謀議不軌帝大怒冬十月甲申劉郃陳球劉納陽球皆下獄死

四年大長秋華容侯曹節卒中常侍趙忠代領大長秋六年春三月鉅鹿張角反以中常侍封諂徐奉等為內

應

事見黃中之亂

中平元年張角之亂帝召羣臣會議北地太守皇甫嵩以為宜解黨禁益出中藏錢西園廐馬以班軍士嵩規之兄子也上問計於中常侍呂彊對曰黨錮久積人情

怨憤若不赦宥輕與張角合謀為變滋大悔之無救今  
請先誅左右貪濁者大赦黨人料簡刺史二千石能否  
則盜無不平矣帝懼而從之士子赦天下黨人還諸徙  
者唯張角不赦是時中常侍趙忠張讓夏惲郭勝段珪  
宋典等皆封侯貴寵上常言張常侍是我公趙常侍是  
我母由是宦官無所憚畏並起第宅擬則宮室上嘗欲  
登永安侯臺宦官恐望見其居處乃使中大夫尚但諫曰  
天子不當登高登高則百姓虛散上自是不敢復升臺榭

及封諂徐奉事發上詰責諸常侍曰汝曹常言黨人欲  
為不軌皆令禁錮或有伏誅者今黨人更為國用汝曹  
反與張角通為可斬未皆叩頭曰此王甫侯覽所為也  
於是諸常侍人人求退各自徵還宗親子弟在州郡者  
趙忠夏惲等遂共譖呂彊云與黨人共議朝廷數讀霍  
光傳彊兄弟所在竝皆貪穢帝使中黃門持兵召彊彊  
聞帝召怒曰吾死亂起矣丈夫欲盡忠國家豈能對獄  
吏乎遂自殺忠惲復譖曰彊見召未知所問而就外自

屏有姦明審遂收捕其宗親沒入財產侍中河內向栩  
上便宜議刺左右張讓誣栩與張角同心欲為內應收  
送黃門北寺獄殺之郎中中山張鈞上書曰竊惟張角  
所以能興兵作亂萬民所以樂附之者其源皆由十常  
侍多放父兄弟婚親賓客典據州郡辜權財利侵掠  
百姓百姓之冤無所告訴故謀議不軌聚為盜賊宜斬  
十常侍縣頭南郊以謝百姓遣使者布告天下可不須  
師旅而大寇自消帝以鈞章示諸常侍皆免冠徒跣頓

首乞自致雒陽詔獄竝出家財以助軍費有詔皆冠履視事如故帝怒鈞曰此真狂子也十常侍固當有一人善者不御史承旨遂誣奏鈞學黃巾道收掠死獄中

朱雋之擊黃巾也其護軍司馬北地傅燮上疏曰臣聞天下之禍不由於外皆興於內是故虞舜先除四凶然後用十六相明惡人不去則善人無由進也今張角起於趙魏黃巾亂於六州此皆釁發蕭牆而禍延四海者也臣受戎任奉辭伐罪始到潁川戰無不尅黃巾雖

盛不足為廟堂憂也臣之所懼在於治水不自其源末  
流彌增其廣耳陛下仁德寬容多所不忍故闕賢弄權  
忠臣不進誠使張角梟夷黃巾變服臣之所憂甫益深  
耳何者夫邪正之人不宜共國亦猶冰炭不可同器彼  
知正人之功顯而危亡之兆見皆將巧辭飾說共長虛  
偽夫孝子疑於屢至市虎成於三夫若不詳察真偽忠  
臣將復有杜郵之戮矣陛下宜思虞舜四罪之舉速行  
讒佞之誅則善人思進姦凶自息趙忠見其疏而惡之

燹擊黃巾功多當封忠譖訴之帝識燹言得不加罪竟亦不封

二年春二月己酉南宮雲臺災庚戌樂城門災中常侍張讓趙忠說帝歛天下田畷十錢以修宮室鑄銅人樂安太守陸康上疏諫曰昔魯宣稅畷而喙災自生哀公增賦而孔子非之豈有聚奪民物以營無用之銅人捐捨聖戒自蹈亡王之法哉內倖譖康援引亡國以譬聖明大不敬檻車徵詣廷尉侍御史劉岱表陳解釋得免



歸田里康續之孫也又詔發州郡材木文石部送京師  
黃門常侍輒令譴呵不中者因彊折賤買僅得本賈十  
分之一因復貨之宦官復不為即受材木遂至腐積宮  
室連年不成刺史太守復增私調百姓呼嗟又令西園  
騶分道督趣恐動州郡多受賕賂刺史二千石及茂才  
孝廉遷除皆責助軍修宮錢大郡至二三十萬餘各有  
差當之官者皆先至西園諧價然後得去其守清者乞  
不之官皆迫遣之時鉅鹿太守河內司馬直新除以有

清名減責三百萬直被詔悵然曰為民父母而反割剥百姓以稱時求吾不忍也辭疾不聽行至孟津上書極陳當世之失即吞藥自殺書奏帝為暫絕修宮錢

六月以討張角功封中常侍張讓等十二人為列侯

秋七月皇甫嵩之討張角也過鄴見中常侍趙忠舍宅踰制奏沒入之又中常侍張讓私求錢五千萬嵩不與二人由是奏嵩連戰無功所費者多徵嵩還收左車騎將軍印綬削戶六千冬十月諫議大夫劉陶上

言天下前遇張角之亂後遭邊章之寇今西羌逆類已  
攻河東恐遂轉盛承突上京民有百先退死之心而無  
一前鬪生之計西寇浸前車騎孤危假令失利其敗不  
救臣自知言數見厭而言不自裁者以為國安則臣蒙  
其慶國危則臣亦先亡也謹復陳當今要急八事大較言  
天下大亂皆由宦官宦官共讒陶曰前張角事發詔書示  
以威恩自此以來各各改悔今者四方安靜而陶疾害  
聖政專言妖孽州郡不上陶何緣知疑陶與賊通情於

金史卷八十一  
是收陶下黃門北寺獄掠按日急陶謂使者曰臣恨不  
與伊呂同疇而以三仁為輩今上殺忠謬之臣下有憐  
悴之民亦在不久後悔何及遂閉氣而死前司徒陳耽  
為人忠正宦官怨之亦誣陷死獄中 是歲帝造萬

金堂於西園引司農金錢繒帛物積堂中復藏寄小黃  
門常侍家錢各數千萬又於河間買田宅起第觀

三年春二月以中常侍趙忠為車騎將軍帝使忠論討  
黃巾之功執金吾甄舉謂忠曰傳南容前在東軍有功

不俟天下失望今將軍親當重任宜進賢理屈以副衆  
心忠納其言遣弟城門校尉延致殷勤於傅燮延謂燮  
曰南容少荅我常侍萬戶侯不足得也燮正色拒之曰  
有功不論命也傅燮豈求私賞哉忠愈懷恨然憚其名  
不敢害出為漢陽太守

五年夏五月故太傅陳蕃子逸與術士襄楷會於冀州  
刺史王芬坐楷曰天文不利宦者黃門常侍真族滅矣  
逸喜芬曰若然者芬願驅除因與豪傑轉相招合上書

言黑山賊攻劫郡縣欲因以起兵會帝欲北巡河間舊宅芬等謀以兵徼劫誅諸常侍黃門因廢帝立合肥侯以其謀告議郎曹操操曰夫廢立之事天下之至不祥也古人有權成敗計輕重而行之者伊霍是也伊霍皆懷至忠之誠據宰輔之執因秉政之重同衆人之欲故能計從事立今諸君徒見曩者之易未覩當今之難而造作非常欲望必克不亦危乎芬又呼平原華歆陶立洪共定計洪欲行歆止之曰夫廢立大事伊霍之所難

芬性疎而不武此必無成洪乃止會北方夜半有赤氣東西竟天太史上言北方有陰謀不宜北行帝乃止敕芬罷兵俄而徵之芬懼解印綬亡走至平原自殺

八月初置西園八校尉以小黃門蹇碩為上軍校尉虎賁中郎將素紹為中軍校尉屯騎校尉鮑鴻為下軍校尉議郎曹操為典軍校尉趙融為助軍左校尉馮芳為助軍右校尉諫議大夫夏牟為左校尉淳于瓊為右校尉皆統於蹇碩帝自黃巾之起留心戎事碩壯健有武

略帝親任之雖大將軍亦領屬焉

冬十月望氣者

以為京師當有大兵兩宮流血帝欲厭之乃大發四方  
兵講武於平樂觀下起大壇上建十二重華蓋高十丈  
壇東北為小壇復建九重華蓋高九丈列步騎數萬人  
結營為陳甲子帝親出臨軍駐大華蓋下大將軍進駐  
小華蓋下帝躬擐甲介馬稱無上將軍行陳三匝而還  
以兵授進帝問討虜校尉蓋勳曰吾講武如是何如對  
曰臣聞先王耀德不觀兵今寇在遠而設近陳不足昭



果毅祗黷武耳帝曰善恨見君晚羣臣初無是言也勲  
謂素紹曰上甚聰明但蔽於左右耳與紹謀共誅嬖倖  
蹇碩懼出勲為京兆尹

六年夏四月蹇碩忌大將軍進與諸常侍共說帝遣進  
西擊韓遂帝從之進陰知其謀奏遣素紹收徐兗二州  
兵須紹還而西以稽行期 初帝數失皇子何皇后  
生子辯養於道人史子眇家號曰史侯王美人生子協  
董太后自養之號曰董侯群臣請立太子帝以辯輕佻

無威儀欲立協猶豫未決會疾篤屬協於蹇碩丙辰帝崩于嘉德殿碩時在內欲先誅何進而立協使人迎進欲與計事進即駕往碩司馬潘隱與進早舊迎而目之進驚馳從僂道歸營引兵入屯百郡即因稱疾不入戊午皇子辯即皇帝位年十四尊皇后曰皇太后太后臨朝赦天下改元為光熹封皇弟協為渤海王協年九歲以後將軍素隗為太傅與大將軍何進參錄尚書事進既秉朝政忿蹇碩圖已陰謀誅之素紹因進親客張津

勸進悉誅諸宦官進以素氏累世貴寵而紹與從弟虎  
賁中卽將術皆為豪傑所歸信而用之復博徵智謀之  
士何顥荀攸及河南鄭泰等二十餘人以顥為北軍中  
候攸為黃門侍郎泰為尚書與同腹心攸爽之從孫也  
蹇碩疑不自安與中常侍趙忠宋典等書曰大將軍兄  
弟秉國專朝今與天下黨人謀誅先帝左右掃滅我曹  
但以碩典禁兵故且沈吟今宜共閉上閣急捕誅之中  
常侍郭勝進同郡人也太后及進之貴幸勝有力焉故

親信何氏與趙忠等議不從碩計而以其書示進庚午  
進使黃門令收碩誅之因悉領其屯兵驃騎將軍董重  
與何進權執相害中官挾重以為黨助董太后每欲參  
干政事何太后輒相禁塞董后忿恚詈曰汝今輒張怙  
汝兄耶吾敕驃騎斷何進頭如反手耳何太后聞之以  
告進五月進與三公共奏孝仁皇后使故中常侍夏惲  
等交通州郡辜較財利悉入西省故事藩后不得留京  
師請遷宮本國奏可辛巳進舉兵圍驃騎府收董重免

官自殺六月辛亥董后憂怖暴崩民間由是不附何氏

秋七月袁紹復說何進曰前竇武欲誅內寵而反

為所害者但坐言語漏泄五營兵士皆服畏中人而竇氏反用之自取禍滅今將軍兄弟並領勁兵部曲將吏皆英俊名士樂盡力命事在掌握此天贊之時也將軍宜一為天下除患以垂名後世不可失也進乃白太后請盡罷中常侍以下以三署郎補其處太后不聽曰中官統領禁省自古及今漢家故事不可廢也且先帝新

棄天下我奈何楚楚與士人共對事乎進難違太后意  
且欲誅其放縱者紹以為中官親近至尊出納號令今  
不悉廢後必為患而太后母舞陽君及何苗數受諸官  
官賂遺知進欲誅之數白太后為其障蔽又言大將軍  
專殺左右擅權以弱社稷太后疑以為然進新貴素敬  
憚中官雖外慕大名而內不能斷故事久不決紹等又  
為畫策多召四方猛將及諸豪傑使並引兵向京城以  
脅太后進然之主簿廣陵陳琳諫曰諺稱掩目捕雀夫

微物尚不可欺以得志况國之大事其可以詐立乎今將軍總皇威握兵要龍驤虎步高下在心此猶鼓洪爐燎毛髮耳但當速發雷霆行權立斷則天人順之而反委釋利器更徵外助大兵聚會彊者為雄所謂倒持干戈授人以柄功必不成祇為亂階耳進不聽典軍校尉曹操聞而笑曰宦者之官古今宜有但世主不當假之權寵使至於此既治其罪當誅元惡一獄吏足矣何至紛紛召外兵乎欲盡誅之事必宣露吾見其敗也初靈

帝徵董卓為少府卓上書言所將湟中義從及秦胡兵  
皆詣臣言牢直不畢稟賜斷絕妻子饑凍牽挽臣車使  
不得行羌胡慙腸狗態臣不能禁止輒將順安慰增異  
復上朝廷不能制及帝寢疾璽書拜卓并州牧令以兵  
屬皇甫嵩卓復上書言臣誤蒙天恩掌戎十年士卒大  
小相狎彌久戀臣畜養之恩為臣奮一旦之命乞將之  
北州効力邊垂嵩從子酈說嵩曰天下兵柄在大人與  
董卓耳今怨隙已結執不俱存卓被詔委兵而上書自



請此逆命也彼度京師政亂故敢躊躇不進此懷姦也  
二者刑所不赦且其凶戾無親將士不附大人今為元  
帥杖國威以討之上顯忠義下除凶害無不濟也嵩曰  
違命雖罪專誅亦有責也不如顯奏其事使朝廷裁之  
乃上書以聞帝以讓卓卓亦不奉詔駐兵河東以觀時  
變何進召卓使將兵詣京師侍御史鄭泰諫曰董卓彊  
忍寡義志欲無厭若借之朝政授以兵柄將恣凶欲必  
危朝廷明公以親德之重據阿衡之權秉意獨斷誅除

有罪誠不宜假卓以為資援也且事留變生殷鑒不遠  
宜在速決尚書盧植亦言不宜召卓進皆不從泰乃棄  
官去謂荀攸曰何公未易輔也進府掾王匡騎都尉鮑  
信皆泰山人進使還鄉里募兵并召東郡太守橋瑁屯  
成臯使武猛都尉丁原將數千人寇河內燒孟津火照  
城中皆以誅宦官為言董卓聞召即時就道并上書曰  
中常侍張讓等竊倖承寵濁亂海內臣聞揚湯止沸莫  
若去薪潰癰雖痛勝於內食昔趙鞅興晉陽之甲以逐

君側之惡今臣輒鳴鍾鼓如雒陽請收讓等以清姦穢  
太后猶不從何苗謂進曰始共從南陽來俱以貧賤依  
省內以致富貴國家之事亦何容易覆水不收宜深思  
之且與省內和也卓至澠池而進更狐疑使諫議大夫  
种邵宣詔止之卓不受詔遂前至河南邵迎勞之因譬  
令還軍卓疑有變使其軍士以兵脅邵邵怒稱詔叱之  
軍士皆披遂前質責卓卓辭屈乃還軍夕陽亭邵罵之  
孫也素紹懼進變計因脅之曰交構已成形勢已露將

軍復欲何待而不早決之乎事久變生復為竇氏矣進  
於是以紹為司隸校尉假節專命擊斷從事中郎王允  
為河南尹紹使雒陽方略武吏司察官者而促董卓等  
使馳驛上奏欲進兵平樂觀太后乃恐悉罷中常侍小  
黃門使還里舍唯留進素所私人以守省中諸常侍小  
黃門皆詣進謝罪唯所措置進謂曰天下匈匈正患諸  
君耳今董卓垂至諸君何不早各就國素紹勸進便於  
此決之至于再三進不許紹又為書告諸州郡詐宣進

意使捕案中官親屬進謀積日頗泄中官懼而思變張讓子婦太后之妹也讓向子婦叩頭曰老臣得罪當與新婦俱歸私門唯受恩累世今當遠離宮殿情懷戀戀願復一入直得暫奉望太后陛下顏色然後退就溝壑死不恨矣子婦言於舞陽君入白太后乃詔諸常侍皆復入直八月戊辰進入長樂宮白太后請盡誅諸常侍中常侍張讓段珪相謂曰大將軍稱疾不臨喪不送葬今欲入省此意何為竇氏事竟復起邪使潛聽具聞其

語乃率其黨數十人持兵竊自側闥入伏省戶下進出  
因詐以太后詔召進入坐省閤讓等詰進曰天下憤憤  
亦非獨我曹罪也先帝嘗與太后不快幾至成敗我曹  
涕泣救解各出家財千萬為禮和悅上意但欲託卿門  
戶耳今乃欲滅我曹種族不亦太甚乎於是尚方監渠  
穆拔劍斬進於嘉德殿前讓珪等為詔以故太尉樊陵  
為司隸校尉少府許相為河南尹尚書得詔板疑之曰  
請大將軍出共議中黃門以進頭擲與尚書曰何進謀

反已伏誅矣進部曲將吳匡張璋在外聞進被害欲引兵入宮宮門閉虎賁中郎將素術與匡共斫攻之中黃門持兵守閤會日暮術因燒南宮青瑣門欲以脅出讓等讓等入白太后言大將軍兵反燒宮攻尚書闕因將太后少帝及陳留王劫省內官屬從複道走北宮尚書盧植執戈於閤道窻下仰數段珪珪懼乃釋太后太后投閤得免素紹與叔父隗矯詔召樊陵許相斬之紹及何苗引兵屯朱雀闕下捕得趙忠等斬之吳匡等素怨

苗不與進同心而又疑其與宦官通謀乃令軍中曰殺大將軍者即車騎也吏士能為報讎乎皆流涕曰願致死匡遂引兵與董卓弟奉車都尉旻攻殺苗棄其尸於苑中紹遂閉北宮門勒兵捕諸宦者無少長皆殺之凡二千餘人或有不鬚而誤死者紹因進兵排宮或上端門屋以攻省內庚午張讓段珪等困迫遂將帝與陳留王數十人步出穀門夜至小平津六璽不自隨公卿無得從者唯尚書盧植河南中部掾閔貢夜至河上貢厲



聲質責讓等且曰今不速死吾將殺汝因手劒斬數人  
讓等惶怖叉手再拜叩頭向帝辭曰臣等死陛下自愛  
遂投河而死貢扶帝與陳留王夜步逐螢光南行欲還  
宮行數里得民家露車共乘之至雒舍止辛未帝獨乘  
一馬陳留王與貢共乘一馬從雒舍南行公卿稍有至  
者董卓至顯陽苑遠見火起知有變引兵急進未明到  
城西聞帝在北因與公卿往奉迎於北芒阪下帝見卓  
將兵卒至恐怖涕泣羣公謂卓曰有詔却兵卓曰公諸

人為國大臣不能匡正王室至使國家播蕩何却兵之  
有卓與帝語語不可了乃更與陳留王語問禍亂由起  
王答自初至終無所遺失卓大喜以王為賢且為董太  
后所養卓自以與太后同族遂有廢立之意是日帝還  
宮赦天下改光熹為昭寧失傳國璽餘璽皆得之以丁  
原為執金吾騎都尉鮑信自泰山募兵適至說袁紹曰  
董卓擁彊兵將有異志今不早圖必為所制及其新至  
疲勞襲之可禽也紹畏卓不敢發信乃引兵還泰山董

卓之入也步騎不過三千自嫌兵少恐不為遠近所服  
率四五日輒夜潛出軍近營明旦乃大陳旌鼓而還以  
為西兵復至雒中無知者俄而進及弟宙部曲皆歸於  
卓卓又陰使丁原部曲司馬五原呂布殺原而并其衆  
卓兵於是大盛乃諷朝廷以久雨策免司空劉弘而代  
之初蔡邕徙朔方會赦得還五原太守王智甫之弟也  
奏邕謗訕朝廷邕遂亡命江海積十二年董卓聞其名  
而辟之稱疾不就卓怒罵曰我能族人邕懼而應命到

署祭酒甚見敬重舉高第三日之間周歷三臺遷為侍

中 董卓謂袁紹曰天下之主宜得賢明每念靈帝

令人憤毒董卓侯似可今欲立之為能勝史侯否人有小

智大癡亦知復何如為當且爾劉氏種不足復遺紹曰

漢家君天下四百許年恩澤深渥兆民戴之今上富於

春秋未有不善宣於天下公欲廢嫡立庶恐衆不從公

議也卓按劍叱紹曰豎子敢然天下之事豈不在我我

欲為之誰敢不從爾謂董卓刀為不利乎紹勃然曰天

下健者豈惟董公引佩刀橫揖徑出卓以新至見紹大  
家故不敢害紹縣節於上東門逃犇冀州九月癸酉卓  
大會百寮奮首而言曰皇帝閭弱不可以奉宗廟為天  
下主今欲依伊尹霍光故事更立陳留王何如公卿以  
下皆惶恐莫敢對卓又抗言曰昔霍光定策延年按劍  
有敢沮大議者皆以軍法從事坐者震動尚書盧植獨曰  
昔太甲既立不明昌邑罪過千餘故有廢立之事今上  
富於春秋行無失德非前事之比也卓大怒罷坐將殺

植蔡邕為之請議卽彭伯亦諫卓曰盧尚書海內大儒人之望也今先害之天下震怖卓乃止但免植官植遂逃隱於上谷卓以廢立議示太傅袁隗隗報如議甲戌卓復集群寮於崇德前殿遂脅太后策廢少帝曰皇帝在喪無人子之心威儀不類人君今廢為弘農王立陳留王協為帝袁隗解帝璽綬以奉陳留王扶弘農王下殿北面稱臣太后慟涕群臣含悲莫敢言者卓又議太后跽迫永樂宮至令憂死逆婦姑之禮乃遷太后於永

安宮赦天下改昭寧為永漢丙子卓酖殺何太后公卿  
以下不布服會葬素衣而已卓又發何苗棺出其尸夫  
鮮節斷棄於道邊殺苗母舞陽君棄尸於苑枳落中

詔除公卿以下子弟為郎以補官官之職侍於殿上

董卓自為太尉領前將軍事加節傳斧鉞虎賁更

封鄢侯 董卓率諸公上書追理陳蕃竇武及諸黨

人悉復其爵位遣使弔祠擢用其子孫 十一月以

董卓為相國贊拜不名入朝不趨劔履上殿 十二

月戊戌以司徒黃琬為太尉司空楊彪為司徒光祿勳荀爽為司空初尚書武威周忠城門校尉汝南伍瓊說董卓矯桓靈之政擢用天下名士以收衆望卓從之命忠瓊與尚書鄭泰長史何顗等沙汰穢惡顯拔幽滯於是徵處士荀爽陳紀韓融申屠蟠復就拜爽平原相行至宛陵遷光祿勳視事三日進拜司空自被徵命及登台司凡九十三日又以紀為五官中郎將融為大鴻臚紀寔之子融韶之子也爽等皆畏卓之暴無敢不至獨




申屠蟠得徵書人勸之行蟠笑而不答卓終不能屈年七十餘以壽終卓又以尚書韓馥為冀州牧侍中劉岱為兗州刺史陳留孔伋為豫州刺史東平張邈為陳留太守潁川張咨為南陽太守卓所親愛並不處顯職但將校而已

董卓性殘忍一旦專政據有國家甲兵珍寶威震天下所願無極語賓客曰我相貴無上也侍御史擾龍宗詣卓白事不解劔立搃殺之是時洛中貴戚室第相望金帛財產家家充積卓縱放兵士突其廬

舍剽虜資物妻掠婦女不避貴賤人情崩恐不保朝夕  
卓購求素紹急周咨伍瓊說卓曰夫廢立大事非常人  
所及素紹不達大體恐懼出犇非有它志今急購之執  
必為變素氏樹恩四世門生故吏徧於天下若收豪傑  
以聚徒衆英雄因之而起則山東非公之有也不如赦  
之拜一郡守紹喜於免罪必無患矣卓以為然乃即拜  
紹勃海太守封邠鄉侯又以素術為後將軍曹操為驍  
騎校尉術畏卓出犇南陽是時豪傑多欲起兵討卓者

素紹在勃海冀州牧韓馥遣數部從事守之不得動搖  
東郡太守橋瑁詐作京師三公移書與州郡陳卓罪惡  
云見逼迫無以自救企望義兵解國患難馥得移請諸  
從事問曰今當助素氏邪助董氏邪治中從事劉子惠  
曰今興兵為國何謂素董馥有慙色子惠復言兵者凶  
事不可為首今宜往視他州有發動者然後和之冀州  
於他州不為弱也他人功未有在冀州之右者也馥然  
之馥乃作書與紹道卓之惡聽其舉兵

通鑑紀事本末卷八上



總校官庶吉士臣張能照

校對官編修臣裴謙

膳錄監生臣邱桂蟾